

Larab

Rebolusyunaryo nga Panmasa nga
Mantalaan han Sinirangan Bisayas

Nobyembre 16, 2019 | Tuig 42 Ihap 14



EDITORIAL

Magmadig-on ngan atuhan an pasista nga terorismo ha Eastern Visayas

HINI NGA MGA nakalabay nga bulan, lumandaw an ginpapintas nga opensiba han 8th Infantry Division-Philippine Army ha Eastern Visayas. Mapagdesisyon hini nga ginpakusog an militarisasyon ngan mga atake ha katawhan ha kabaryuhan ngan kasyudaran agud puypuyon an base panmasa ngan tapuson an rebolusyunaryo nga kagiusan ha rehiyon. Tikang han pirmahan han pasista nga hi Duterte an Executive Order No. 70 o an "whole-of-nation" approach ngan ideklara an Memorandum Order No. 32, gintagan dalan hini an mas grabe nga mga pagtamak ha mga katungod han katawhan. Gindadako pa han kumander han 8th ID nga hi Maj. Gen. Pio Diñoso III nga waray iba nga hihimuon an iya pwersa militar kundi gamiton an bug-os nga kusog hini para ha

"kontra-insurhensiya" nga programa ni Duterte.

Dako nga kwarta an igin-alutaga ni Duterte para ha badyet han gerra. Masobra P6 milyon an ginwawaldas ni Duterte ha kada maihaan nga operasyon han iya tropa. Hini la nga Oktubre 26, gumamit pa an 8th ID han idro nga FA-50 agud maghulog han tulo nga bomba ha Brgy. Caputoan, Las Navas, Northern Samar. Diri an Bagong Hukbong Bayan (BHB) kundi mga kabablayan, umhanan, mga panginanut ngan iba pa nga higamit han masa an ira naigo ngan nahibang. Dirudilain nga pagtamak ha tawhanon nga katungod sugad han pangaresto, pantortyur, ngan panarhug an iginhimo han 20th Infantry Battalion ha mga baryo han Epaw, San Francisco, San Jose, ngan Sag-

26 nga sundalo, kaswalti han 14th IB ha Borongan

DIRI MAMENOS HA unom nga sundalo an patay samtang maabot 20 an samaran ha madinaugon nga ambus han BHB-Eastern Samar (Sergio Lobina Command o SLC) kontra ha ginkumbinar nga pwersa han Alpha ngan Charlie Companies, 14th Infantry Battalion ha Sityo Bangon, Brgy. Pinanag-an, Borongan City hadton Nobyembre 11 dapit alas-5 han kulop, sigon ha mga inisyal nga sumat.

Dudrungan nga ginpabuto han mga Pula nga mangaraway an unom nga *command-detonated explosive* (CDX) kontra ha tulo nga seksyon han 14th IB nga nag-ooperasyon kombat ha lugar. Inabot hin katunga kaoras an balyuay han bubto.

Ginbira an 14th IB tungod kay tagpagpatuman ini han kontra-katawhan nga gerra han rehimen Duterte. Dabi ini ha panharas ngan panarhug ha mga molupyo han mga barangay han Boco, Pandol ngan Can-ilay ha bungto han Can-avid, Samar hadton Pebrero 2018.

Ginsaludaran naman ni Prop. Jose Maria Sison, tagapangulo nga tagapagtukod han Partido Komunista ng Pilipinas (PKP), an mga Pula nga kumander ngan mangaraway para hini nga kadaugan. Sigon kan Sison, angay ini magserbe nga inspirasyon ha katawhan ngan ha BHB nga mas pakusgon pa an pag-ato ha rehimen Duterte.

Dugang niya, sukwahi ha akusasyon han AFP, gintutugutan han internasyunal nga balaud han gerra an paggamit han CDX. Mas mapanhibang naman an mga bomba han AFP nga ntarget han mga komunidad han mga sibilyan, sugad han pagbomba han hadi han edro ha Brgy. Caputoan, Las Navas, Northern Samar.

"8th ID...", "tikang ha paypay 1

od ha Las Navas. Ha lurong hini nga inop nga tapuson an rebolusyunaryo nga kagiusan, nagserbe nga kolateral an kinabuhi han mga sibilyan.

Tungod kay nahurak na an mabaho nga ginhihimo han mga peace and development team (PDT) nga iginlatag ha bug-os nga EV, utro nga gin-atentar han 8th ID nga pahamuton ngan ginliwat ini komo Retooled Community Support Program Operations (RCSPPO). Ilarum ini han ginbug-os nga Regional Task Force 8 to End Local Communist Armed Conflict nga maghahatag prayoridad ha 31 nga barangay han Samar ha urhi nga kwarter hini nga tuig. Magkalin-lain nga aktibidad an hihimuon ha mga nasering nga baryo sugad han libre nga arot, livelihood training, pauyag ngan mga serbisyo medical nga puros mga pabilib o temporaryo nga solusyon ha mga problema han masa. Tuyo hini nga himuon nga madalunot an pagsulod han pwersa militar ha mga barangay ngan mas madagmit nga maipatuman an mga operasyon nga kombat-paniktik-saywar. Labot hini, ilarum han 2019 Local Government Support Fund-Other Financial Assistance to LGU, hahatagan kuno han tag-usa kamilyon kapisos an kada barangay. Sugad han programa nga E-CLIP kun diin may saad nga kwarta ngan pakabuhì ha ngatanan nga mga "magbabalik-loob" ha gubyrno, waray ini pinaglamin ha piniritay nga pagpapasurender han AFP ha katawhan.

Ngan kun naninindugan ka para ha imo mga katungod, target ka hini nga rehimen. Mahinunumduman nga waray kaluoy nga ginpatay han 20th IB ngan 46th IB, mga yunit ilarum han 8th ID, an duha nga kapitan nga hira Apolinario Lebico ngan Wilmar Calutan, mga nariwa ha militarisasyon ha ira lugar. Gintarget liwat an militante nga paraguma nga hi Baby Senobio han Las Navas, Northern Samar. Tungod ha iya pagigin aktibista ngan kilalado nga tagapagyakan han iya organisasyon, gintatarhug hiya, ginhaharas, ginre-Red tag. Ginpipirit liwat han 20th IB nga igdeklara han munisipyo han Las Navas hi Senobio komo "persona non grata." Waray liwat matalwas ha kamot han 20th IB an kaapi han Northern Samar Small Farmers' Association (NSSFA) nga hi Christian Sabado kahuman ini itortyur, igpriso ngan ginpirit nga gamiton han militar lakip an iya pamilya. Bisan an usa nga empleyado han gubyrno nga hi Maureen Japzon, nagin biktima liwat han ekstrahudisyal nga pagpatay tungod kay nagin aktibista hiya hadto.


Grabe nga *Red-tagging* liwat an nahiaaguman han mga progresibo nga grupo sugad han BAYAN, Gabriela, ngan Kilusang Mayo. May grabe liwat nga sarbeylans ngan tarhug han reyd ha ira mga upisina. Ginsundan naman han unom nga aset han military an mga paraguma nga delegado han Stand With Samar-Leyte nga aada ha Mayni-

la. Sugad liwat an nahiaaguman han ikaduha nga pankabug-usan nga sekretaryo han BAYAN nga hi Rey Miranda ngan han tagapagyakan han KMU nga hi Roy Perez.

An ginpapintas ngan ginpagrabe nga pasista nga atake han 8th ID panigamnan han desperasyon ni Duterte. Imbes nga kilal-on ngan atubangon ni Duterte an gamot han armado nga pakig-away, gin-uuna niya an pagpapabilin ha poder tungod kay nahahadlok hiya nga papagbaydon ha iya mga sala, hul-os nga bumagsak ngan puruton ha basurahan han kasaysayan.

Kinahanglan magmadig-on ngan umato an katawhan han Eastern Visayas. Kinahanglan nira gamiton ngaduha an ligal ngan iligal nga pakigsog agud madagmit nga ibuksas an mga krimen han 8th ID ngan sukton hira ha ira mga sala. Kinahanglan an pinakahiluag nga pagkaurusa han magkalin-lain nga sektor, sangkay ngan alyado sugad han mga kabatan-unan ngan estudyante, mga tawo ha singbahan, akademiko, midya, abugado, makanasud nga mga upisyal han gubyrno ngan mga tagapanalipod han tawhanon nga katungod. Bug-uson an pinakahiluag nga han-ay para ha kontrapasista nga pakigbisog. Dugang pa, ipasulong an armado nga pakig-away ngadto ha bag-o ngan mas hitaas nga balitang, pakyason an kontrarebolusyunaryo nga opensiba han 8th ID ngan ihimulag ngan pabagsakon an pasista nga rehimen Duterte. ■

31 nga prayoridad nga barangay han Regional Task Force to End Local Communist Armed Conflict (RTF-ELCAC)



BALITA

JTF Storm ha Las Navas, ginpakyas han BHB

PAKYAS AN JOINT Task Force Storm han AFP nga pulbuson an BHB-Northern Samar (Rodante Urtal Command o RUC) han maglansar han usa kabulan nga operasyon kombat ha bungto han Las Navas hini nga Oktubre.

Naglansar han madinaugon nga ser-ye han mga taktikal nga opensiba an RUC kontra ha 500-katawo nga ginkumbinar nga pwera han 20th IB ngan 81st Division Reconnaissance Company ha mga barangay han Epaw, San Jose, Sag-od ngan Tagab-iran tikang Oktubre 6-15. Maabot ha 11 an napatay ngan tulo an samaran nga sundalo. Naghalad naman han kinabuhi an usa nga Pula nga mangaraway samtang tulo liwat an nasamaran ha gapil han BHB.

Nagwaldas an militar han P6 milyon nga pondo para hini nga maihaan nga operasyon. Gin-gamit liwat han JTF Storm an magkalain-lain nga aset ha kahanginan, kalakip an *drone*, *helicopter*, ngan edro nga FA-50 nga naghimo han "surgical" airstrike nga nanhibang han mga umhanan han masa.

An JTF Storm gintukod han AFP Central Command ngan 8th Infantry

Division nga nagtutumuyo nga hul-os nga puypuyon an BHB ha Samar ha urhi nga kwarter han 2019.

Western Samar. Madinaugon liwat nga naka kontra-opensiba an usa kaiskwad han BHB-Arnulfo Ortiz Command (AOC) kontra ha usa nga yunit han 63rd IB hadton Oktubre 8 ha Brgy. Canlobo, Pinabacdao. Diri mamenos ha duha an kaswalti han militar samtang talwas nga nakaatras an mga Pula nga mangaraway. Ginharas pa liwat han BHB-AOC an masobra 50 nga elemento han 63rd IB hadton Oktubre 19. ■



NDF-EV, ginkundenar an panmomba ha Las Navas

HUGOT NGA GINKUNDENAR han National Democratic Front-Eastern Visayas an ginhimo nga panmomba han Joint Task Force Storm han AFP hirani ha komunidad han Brgy. Caputoan, Las Navas, Northern Samar hadton aga han Oktubre 26.

Gin-amin mismo han 8th ID nga gintuyo nira nga ihulog an tulo nga 227 kakilo nga bomba ha umhanan nga usa kakilometro la an kahirayun ha baryo. Ha pagtarget nira ha usa nga yunit han BHB, diri mamenos ha 13 nga pamilya an nawarayan han urukyan, mga humay ngan iba pa nga propyedad.

Kahuman an panmomba, nag-istra-ping liwat hira gamit an massingan agud maseguro nga naigo an ira target. Ha grabe nga kahadlok han mga residente, diri mamenos ha 12 nga pamilya han Brgy. Capootan an nag-ebakwet tikadto ha barangay han Paco ngan El Empon.

Signon ha NDF-EV, pakyas an 20th IB ngan 81st DRC ha pagpuypoy han bisan usa nga yunit han BHB. Nagresulta la an ira mga operasyon, nga nabalor ha P6

milyon ha kalugaringon nira nga kaswalti. Nagdaug la an AFP ha padayon nga pangabuso ngan panarhug ha mga residente. Ginpapagrabe la nira an kangkalas han masa ha AFP ngan ha pasista nga kumander hini nga hi Duterte.

Nakig-usa liwat an NDF-EV ha mga residente han Las Navas ha ira pagkundenar ha JTF Storm ngan nagtitikagrabe nga pangabuso han AFP. Nanawagan ini nga sukton an AFP ngan hi Duterte ha paggamit han milyon-milyon nga pondo han katawhan para ha ira mga operasyon. Gin-aghat liwat an bug-os nga Eastern Visayas nga magkaurusa agud perdhon an JTF Storm. An ira suporta ha gerra han katawhan an magpeperdi ha Oplan Kapayapaan ngan magpabagsak ha rehimen Duterte. ■

Relief ngan fact-finding mission, ginhimo ha Las Navas

USA NGA RELIEF ngan *fact-finding mission* an ginhimo han mga organisasyon tikang ha magkalain-lain nga sektor ha pangunguna han Stand With Samar-Leyte Network ha bungto han Las Navas hini nga Nobyembre 11-12. Ginhatagan han ayuda nga pagkaon an maabot ha 300 nga pamilya nga tikang ha mga baryo han Caputoan, Paco, Quirino, Epaw, El Empon, Sag-od ngan Cuenco, nga apektado han militarisasyon ngan usa katuig na nga kathuraw.

Signon kan Bayan Muna Representative Ferdinand Gaite, usa ha mga delegado han *fact-finding mission*, maiha na nga angay igdeklara an *state of calamity* ha prubinsya han Northern Samar tungod ha grabe nga kathuraw ngan panmeste ha mga panginangnum nga amo an nagpaluros han produksyon. Waray maihatag an dagmit nga ayuda han gubyerno ha mga parag-uma.

Nagsaad liwat hi Gaite nga igiinsister han Makabayan bloc ha Kongreso nga imbestigaran an mga pangabuso han militar. Kalakip dinhi an mga pangabuso ha Brgy. Sag-od ngan an "surgical" airstrike han 8th ID ha Brgy. Caputoan kun diin nahibang an umhanan han 13 nga pamilya. Ha summat han mga residente, nabay-og an tuna han bumuto an bomba, ngan ha kahadlok, napiritan hira nga bayaan an ira mga balay, hayop ha panguma, ngan umhanan. Pag-uli nira, pinan-ngawat na ngay-an han mga sundalo han 20th IB an ira mga hayop, bugas, kwarta, kaldero, ngan bisan an mga sundang.

Nagpadara liwat han dugang nga 10 kakaban han bugas hi Northern Samar 2nd District representative Jose "Jun" Ong ko-mo suporta ha nasering nga *relief operations*. ■

Kabangisan ngan kagutom ha EV, ginbuksas ha Manila

BUMIYAHE NGADTO HA Manila an mga parag-uma tikang ha Eastern Visayas hini nga Nobyembre 7 agud ibuksas an grabe nga kabangisan ngan kagutom nga ira nahiaaguman ha kamot han 8th ID ngan han rehimen Duterte.

Ha pangunguna han Stand With Samar-Leyte (SWS-L) Network, ginlibot han mga parag-uma an Kongreso ngan magkalain-lain nga singbahan ngan eskoylahan agud isumat an mga pangabuso han militar, sugad han panmomba han mga komunidad, panmatay, tortyur, ilegal nga pangaresto, piniritay nga pagpasurender, ngan panarhug. Ginrereklamo liwat nira an pagpasibaya ha ira han rehimen Duterte, nga nagpagrabe han ira gin-aantos nga kakuri-an tungod han kathuraw, panmeste ha abaka, ngan himubo nga presyo han humay ngan kopras.

Pumarti-sipar an mga parag-uma ha Black Friday Protest hadton Nobyembre 8 ha University of the Philippines-Diliman, nga ginpartisiparan liwat han mga kabatan-unan-estudyante ngan iba pa nga sektor. Dinhi nanawagan han suporta hi Baby Senobio, *convenor* han SWS-L, labina kay ginpipirit han 20th IB an mga upisyal han Las Navas nga igdeklara hiya ngan an iba pa nga prog-



resibo nga grupo komo "persona non grata." Maiha na nga malisyoso nga ginrere-Red tag han 20th IB an mga grupo nga Northern Samar Small Farmers Association, Samahan han Gudti nga Parag-uma ha Sinirangan Bisayas, Katungod Sinirangan Bisayas ngan BAYAN-Eastern Visayas. ■

Militarisasyon, Red-tagging ngan harasment ha Western Samar

GINSUKNA HAN KAPUNUNGAN han mga Parag-uma ha Weste (KAPAWA) an susrunod nga operasyon han militar ha mga bungto han Western Samar, mas makusog nga Red-tagging ngan harasment ha mga upisyal han lokal nga guberno hini nga naglabay nga bulan atubangan han maluya nga produksyon ha uma.

Nag-operasyon an mga kasundalohan ha Brgy. Canbais ngan San Andres ha Motiong hadton Oktubre 23. Pagkalabay han tulo kaadlaw, nag-operasyon liwat an mga sundalo ha mga barangay han Nawi, Tapul ngan Pagsanghan sakop han bungto han Paranas. Hadton Oktubre 29, mayda liwat operasyon ha mga barangay han Calunda, Bay-ang, Libertad ngan Gayundatu ha bungto han San Jorge. Samtang, nagpapadayon gihapon an makusog nga operasyon militar ha mga bungto han Matuguinao, Calbiga, Pinabacdao, Basey, Villareal ngan Marabut. Gintikangan naman an PDT/RCSP *operation* ha Brgy. San Andres, Catbalogan City sulod han tulo kabulan.

Sigon pa ha KAPAWA, ginpipirit an mga upisyal han barangay nga igdeklara komo "persona non grata" an PKP-BHB. Piniritay liwat nga ginpapapirma an mga upisyal ha dokumento nga nagtutugot ha pulis ngan militar nga okuparon an ira baryo.

Gin-gamit han 87th IB an FM *station* agud i-Red tag an mga upisyal han munisipyo ha bungto han San Jose De Buan kaapi hira Mayor Joaquin Elizalde, Vice Mayor nga hi Wilson Orcino ngan duha nga konsehal nga hira Joel Labong ngan Bobie Pomarca. Gin-aakusaran hira nga nasuporta ha BHB tungod kay ginpakaraut han militar nga ginsuportahan hira han BHB para magdaug ha eleksyon.

Gin-eksplikar naman ni Jun Labong, tagapagyakan han KAPAWA, nga atubangan han makuri ngan maluya nga produksyon durot han kalamidad ngan peste, an paglalansar han nagtikapintas nga militarisan ngan gintatagan han panahon han rehimen Duterte.

Gin-aghat han KAPAWA an ngatanan nga parag-uma nga magkaurusa agud ipanawagan an madagmit nga panhatag han ayuda han guberno ha mga biktima han kalamidad ngan tapuson an militarisan ngan rehimon. ■

Ika-6 nga anibersaryo han Yolanda, gintapo han protesta

GINPANGUNAHAN HAN PEOPLE Surge an martsa han mga biktima han superbago nga Yolanda ha ika-unom nga anibersaryo han panlasurbo han bagyo hadton Nobyembre 8 ha Tacloban. Upod an magkalain-lain nga progresibo nga organisasyon, utro nira nga ginsukot an rehimen Duterte ha nagpapadayon nga kurapsyon ngan pagpapasibaya ha ira.

Nagsalawad naman han kaso an 400 nga kaapi han Coalition of Yolanda Survivors and Partners ha Office of the Ombudsman ha Tacloban hadton Nobyembre 7 hiunong ha maanomaliya nga proyekto nga pabalay han National Housing Authority (NHA) ha Eastern Samar.

Ginsulong naman han mga kablas-ha-syudad ha pangunguna han Kadamay Metro Tacloban an martsa hadton Nobyembre 6 agud sukton an ginsaad nga pabalay.

Naghalad liwat han dasal an mga

"Ika-6 nga anibersaryo..." sundan ha paypay 5

"Ika-6 nga anibersaryo...", tikang ha paypay 4

biktima han Yolanda ha mga mass grave ha Holy Cross Cathedral, Tanauan, San Joaquin ngan Palo Cathedral. Usa naman nga peace concert an ginhimo ha UP Tacloban.

Padayon nga pagpapakuri ngan pan-ngawat

Waray pa gihapon naabat nga batakan nga pagbabag-o an mga biktima han bagyo nga Yolanda tungod ha padayon nga pagpapasibaya han rehimen Duterte. Gindadako han NHA nga kahuman han unom katuig, masobra katunga na han 205,128 nga balay para ha mga ginlasurbo han bagyo nga Yolanda an nahuman. Kundi para ha People Surge, diri pa gihapon nareresolba an isyu han pabalay. Ha Tacloban, maabot 8,000 nga residente an possible nga paiwason ha Cancabato Bay para ha proyekto nga reklamasyon dinhi nga kabaybayunan. Nagpapabilin liwat an tarhug han demolisyon ha mga pag-yag-payag nga ginhimo han gatus-gatos nga pamilya ha mga gindeklara nga No-Build Zone tungod kay waray pa gihapon hira mabalhinan. Grabe nga kakurian ngan kagutom an gin-aantos han mga parag-uma nga diri pa naka-

kabawi ha pandestroso han bagyo.

Ginbuksas liwat han People Surge an padayon nga hiluagan nga pangungurakot ha mga proyekto nga pabalay han NHA. Himubo nga kalidad han baras ngan puthaw an gin-gamit ha pagtindog han mga pabalay ha norte han Tacloban, ha Julita, Leyte, ngan ha Giporlos, Eastern Samar, agud makagbursa han pampubliko nga pondo an mga kontraktor. Diri pa gihapon napapagbaton an 12 nga upisyal han NHA nga ginsalawdan han kaso kasumpay han isyu han iligal nga subcontracting. Namemeligro an mga residente ha mga balay han NHA, sugad ha Ridgeview Park Tacloban nga nagkaada han butak ha pader kahuman ini bay-ugon han linog hadton Abril tungod ha ginhihimo nga kurapsyon.



Nagpapabilin nga pribatisado ngan komersyalisado an plano nga rehabilitasyon han rehimen Duterte. Ginpapalayas ha ira mga komunidad an kablas-ha-syudad, parag-uma ngan parupangisda agud tagan dalan an mga dagko nga negosyo nga nagtutumuyo nga agawon an ira tuna ngan magtindog han mga pasyadahan ngan komersyal nga establisyimiyento. Lugod, nagpapabilin hira nga bulnerable ha masunod nga mga kalamidad. **L**

Pagsaludar

Mapula nga pagsaludar kan Ka Uno!

GINPASIDUNGGAN HAN BAGONG Hukbong Bayan-Rodante Urtal Command si Roger Pajenado "Ka Uno" Cocoya ha iya paghalad han kinabuhi ha naglabay nga engkwentro giutan han pasista ngan mersenaryo nga tropa han AFP ngan han rebolusyunaryo nga pwersa han NPA. Ha edad na 22, labaw nga mas dako an nagin amot ni Ka Uno ha pag-undang han interes han katawhan tanding ha pasista nga hi Rodrigo Duterte.

Bata pa la, napukaw na ha pakikigrebolusyon hi Ka Uno. Umapi hiya ha Kabataang Makabayan ha ira baryo ngan ginpamunuan niya an mga kabatan-unan ha ira mga lokal nga kampanya. Kalakip hini an paghahatag han magkalain-lain nga pisikal, materyal ngan moral nga suporta ha BHB. Kaapi liwat hiya han yunit milisya ngan pumartisipar ha magkalain-lain nga operasyon sugad han isnayp ngan haras.

Waray pag-iha, napinsar niya nga mas dako an iya mahiaamot ha armado nga pakig-away ha pagpupultaym komo Pula nga mangaraway han BHB. Mas nagin aktibo hi Ka Uno, hul-os ngan bug-os nga kumatin han mga responsabilidad, tikang ha gudti ngan simple nga buruhaton sugad han pag-alog tubtub ha pagpartisipar ha mga

iginlalansar nga magdinaugon nga taktikal nga opensiba han iya yunit. Diri la ha karukayaknon militar nagpursige hi Ka Uno. Kadungan hini, nagpursige liwat hiya ha pag-aram ha pulitika. Ha BHB na hiya nakag-aram han literasiya ngan numerasiya. Nanalinguha hiya nga makaapi permi ha mga pag-aradman ngan nakagradwar hiya han Batakan nga Kurso han Partido.

Nagin suok hi Ka Uno ha masa tungod han iya maupay ngan malipayon nga aktitud. Sigurado liwat nga ini an kahihidlanan han iya mga kakolektibo. An kamatayon ni Ka Uno mas mabug-at pa ha Bukid Huraw ngan surok han kusog ngan inspirasyon han mga kasama ngan masa nga igpadayon an pakig-away tubtub ha makab-ot an kadaugan. **L**

Larab

Rebolusyunaryo nga Panmasa nga Mantalaan han Sinirangan Bisayas

Nobyembre 16, 2019 | Tuig 42 Ihap 14

 ndf.easternvisayas

 @ndfevisayas

 ndfevis@gmail.com

 evsirang.blogspot.com

I-download an PDF:

tinyurl.com/NDFEVMediaOfficePubs